
*CRITERIOS DE PROMOCIÓN E TITULACIÓN NO
CURSO 2021-2022*



XUNTA DE GALICIA
CONSELLERÍA DE CULTURA,
EDUCACIÓN E UNIVERSIDADE

 **I.E.S. Terra de Soneira**

A Orde do 25 de xaneiro de 2022 pola que se actualiza a normativa de avaliación nas ensinanzas de educación primaria, de secundaria obrigatoria e de bacharelato no sistema educativo de Galicia, establece cambios no relativo aos criterios de promoción e titulación do alumnado da ESO e Bacharelato que compre dar a coñecer á comunidade educativa. O presente documento recolle os anteditos cambios normativos así como a concreción da normativa á realidade do centro no tocante á promoción e titulación do alumnado do noso centro.

1. ENSINANZA SECUNDARIA OBRIGATORIA

Promoción

O artigo 8 da Orde do 25 de xaneiro establece que acadará a promoción dun curso a outro da ESO o alumnado que superase as materias ou ámbitos cursados ou teña avaliación negativa nunha ou dúas materias, considerándose para o cómputo as materias non superadas do propio curso e cursos anteriores. Ademais de nos anteriores casos o equipo docente poderá decidir a promoción dunha alumna ou dun alumno, sempre que se cumpran tamén as condicións seguintes:

- a) Que a media aritmética das cualificacións obtidas en todas as materias en que estea matriculada ou matriculado nese ano académico sexa igual ou superior a cinco.
- b) Que o equipo docente considere que a natureza das materias non superadas lle permite seguir con éxito o curso seguinte.
- c) Que o equipo docente considere que ten expectativas favorables de recuperación.
- d) Que o equipo docente considere que a devandita promoción beneficiará a súa evolución académica.

A permanencia no mesmo curso considerarase unha medida de carácter extraordinario e tomarase logo de esgotar as medidas de reforzo e apoio de carácter ordinario.

O alumnado que acade a promoción con materias pendentes deberá seguir un plan de reforzo en cada unha desas materias.

Realizaranse durante o curso tres avaliacións parciais e unha avaliación final. O período comprendido entre a terceira avaliación parcial e a avaliación final adicarase á realización de actividades de recuperación para aquel alumnado que non superase algunha materia. O equipo docente realizará un informe de avaliación individualizado que servirá de base para o deseño das actividades de recuperación. Poderanse realizar tamén actividades de ampliación que poidan permitir mellorar a cualificación do alumnado.

Titulación

O artigo 10 da Orde do 25 de xaneiro regula a titulación na ESO. A decisión de titulación ao finalizar o cuarto curso da ESO será adoptada de xeito colexiado atendendo á adquisición das competencias establecidas e á consecución dos obxectivos da etapa.

Obterá o título de graduado en ESO o alumnado que supere todas as materias ou ámbitos cursados. Ademais de no caso anterior, o equipo docente poderá decidir a obtención do título por parte dunha alumna ou dun alumno, sempre que se cumpran tamén todas as condicións seguintes:

- a) Que a media aritmética das cualificacións obtidas en todas as materias en que estea matriculada ou matriculado nese ano académico sexa igual ou superior a cinco.

b) Que a xuízo do equipo docente a alumna ou o alumno adquirise as competencias establecidas.

c) Que a xuízo do equipo docente a alumna ou o alumno alcanzase os obxectivos da etapa.

O alumnado que, logo de finalizado o proceso de avaliación do cuarto curso de educación secundaria obrigatoria, non obteña o título e supere os límites de idade establecidos na Lei orgánica 2/2006, tendo en conta así mesmo a prolongación excepcional da permanencia na etapa que prevé a propia lei poderao facer nos dous cursos seguintes a través da realización de probas ou actividades personalizadas extraordinarias das materias que non superase.

2. BACHARELATO

Promoción

O artigo 14 da Orde do 25 de xaneiro de 2022 regula a promoción no Bacharelato. As alumnas e os alumnos acadarán a promoción de primeiro a segundo curso de Bacharelato cando superen as materias cursadas ou teñen avaliación negativa en dúas materias como máximo, computándose só as materias que como mínimo a alumna ou o alumno deben cursar en cada bloque. No bloque de materias de libre configuración autonómica só se computará Lingua Galega e Literatura, con independencia de que as alumnas e os alumnos poidan cursar máis materias do devandito bloque.

Aqueles alumnos ou alumnas que acaden a promoción a segundo curso con materias pendentes de primeiro deberán matricularse delas e cursalas ao longo do curso. O centro organizará as consecuentes actividades de seguimento, recuperación e avaliación destas materias pendentes, sendo tendo que ser o alumnado informado a comezo de curso sobre o desenvolvemento das mesmas.

Aqueles alumnos ou alumnas que obtivesen avaliación negativa nalgunha materia de segundo curso poderán matricularse delas sen necesidade de cursar de novo as materias superadas.

Titulación

O artigo 15 da Orde de 22 de xaneiro de 2021 regula a obtención do título de Bacharelato. Para a obtención do título o alumno ou a alumna deberá obter avaliación positiva en todas as materias dos dous cursos de Bacharelato. Excepcionalmente o equipo docente poderá decidir a obtención do título de Bacharelato por un alumno ou alumna que superase todas as materias agás unha, sempre que se cumpran ademais todas as condicións seguintes:

- a) Que o equipo docente considere que a alumna ou o alumno alcanzou as competencias e os obxectivos vinculados a ese título.
- b) Que non se produciu unha inasistencia continuada e non xustificada por parte da alumna ou do alumno na materia.
- c) Que a alumna ou o alumno se presentou ás probas e realizou as actividades necesarias para a súa avaliación, incluídas as da convocatoria extraordinaria.
- d) Que a media aritmética das cualificacións obtidas en todas as materias da etapa cursadas que como mínimo se requiran para a obtención do título pola modalidade pola que se remata sexa igual ou superior a cinco. Neste caso, para os efectos do cálculo considerarase a nota numérica obtida na materia non superada.

A efectos do punto c) anterior considerarase inasistencia continuada a perda do dereito a avaliación continua segundo os criterios das Normas de organización e funcionamento do centro.

Durante o curso realizaranse tres avaliacións parciais, unha avaliación final do período ordinario (que coincidirá coa terceira avaliación parcial) e unha avaliación final

extraordinaria. No período abrangido entre a avaliación final ordinaria e a final extraordinaria organizarase para o segundo curso a impartición de clases de preparación da avaliación de acceso á universidade e para o primeiro curso a impartición de actividades de recuperación e ampliación.